

A la tschertga da la cuntrada origina

In premi per ina fotografa d'architectura e da la natira origina

■ **(anr/vi) Lucia Degonda è creschida si a Goldau (SZ). Ella viva oz sco fotografa libra a Turitg e Sumvitg. Il venderdi passà ha ella obtegnì il premi da reconuschientscha dal chantun Grischun.** «Nus stuevan adina declerar danunder che nus vegnin», quinta Lucia Degonda da sia uffanza en il chantun Sviz. Da quel temp eria in num ester sco Degonda a Sviz anc insatge nunusità. Lucia e ses quatter fragliuns avevan pia savens d'explicar ch'il bab derivia dal Grischun. Quai haja rinforzà ils lioms cun il chantun patern.

Da mattatscha passentava Lucia sias vacanzas savens tar la parentella a Rabius. Pli tard gievan ils Degondas da Goldau era si Pèrapuoz, il mises en Val Sumvitg.

Finanzià sezza il studi

Da giuvna dissegnava ella bler ed avess gugent gia suenter scola emprendì ina clamada artistica. «Ma da mes temp n'era quai strusch pussaivel en la Svizra centrala.» Perquai ha ella fatg il seminari da scolastas ad Ingenbohl. Là ha ella gi' instruziun da disegnar tar la sora ed artista Gielia Degonda*. «Ella ha mussà a mi la via. Tar ella hai jeu l'emprima giada senti ch'insatgi prenda serius la lavur artistica.»

Suenter il seminari ha la giuvna scolasta dà scola in onn, ma il medem temp è ella era s'infurmada per ina scolaziun sco fotografa u sco decoratura da culissa. Il 1977 ha ella cumenzà il studi da fotografa a la Scola d'art applitgà a Turig. «Per mia famiglia muntava quai da quel temp in pass enavos», sa regorda Degonda. Ma ella eria segira



Lucia Degonda viva a Turitg e Sumvitg. Damai ch'ella fotografescha gugent muntognas è ella er in'alpinista versada.

FOTO C. CADRUVI

ch'i saja la dretga via, ed ella haja era vulì finanziar sezza il studi.

Fotografar per turissem

Cun il diplom da fotografa en satg è Degonda ida tar «Schweiz Tourismus». Lentschatta en la vita pratica saja stada dira. «Jau n'avev betg emprendì da fotografar cuntradas.» E lez duvravi tar l'uniun turistica. Ma cun il temp è Degonda daventada in'experta. Ella saveva exact tge glisch e posiziuns ch'èn necessarias per fotografar ina cuntrada turistica.

Gist da quel temp ha ella era cumenzà a sviluppar sia atgna maniera da fotografar cuntradas u muntognas. Ella di: «Ina fotografia turistica mussa ina cuntrada idealisada cun ina vesida romantica.» Ma quai n'interessava atgnamain betg ella: «Jau lev fotografar cuntradas originas, betg cultivadas.» Perquai è Degonda ida, sper sia

teressada pli fitg per las structuradas en il grip ed en la glera. E dapreschent s'occupescha ella cun il guaud.

Degonda na fa nagina differenza tranter fotografias artisticas e betg artisticas. Persuenter sparta ella tranter lavurs sin incumbensa e lavurs libras. Tar fotografias sin incumbensa vul ella exprimer in messadi fitg cler. «Ma tar lavurs libras vai per in eveniment visual.» In eveniment che lascha tiers pliras interpretaziuns ed evotgescha sentiments.

Docenta a la scola d'art applitgà

Dapi il 1986 lavura Degonda sco fotografa independenta. Ella posseda ensemble cun in collega in atelier damanivel da la staziun Stadelhofen. In temp ha ella fotografà per teaters a Turitg. Ils ultims onns hai dà adina pli bleras lavurs en il Grischun. Uschia ha ella p.

ex. fatg ils maletgs e purtrets per il «Kulturführer Val Lumnezia und Vals». Durant questa lavur ha la fotografa inscuntrà l'architect Gion A. Caminada. Dal inscunter è resorti ina stretga collavuraziun tranter la fotografa e l'architect. Oz è Degonda era ina experta tschertgada da la fotografia d'architectura.


Dapi il 1996 è Degonda plinavant docenta a la Scola d'art e d'art applitgà a Turitg. Ed al MAZ, il center da scolaziun per meds da massa a Lucerna, instruescha ella istorgia da fotografia. Davart questa lavur di ella: «Sco fotografa èn ins adina persula. Ins decida adina tut sulet co ch'il maletg ha dad esser. Perquai sun jau leda che la scola cun il team da docents e students porcha a mi in bun equilibr.»

* L'artista Gielia Degonda deriva da Cumpadials. Ella n'è betg parentada cun la fotografa Lucia Degonda.

Premi da reconuschientscha per...

Lucia Degonda obtegna il premi da reconuschientscha per sia lavur fotografica che intermediatescha a moda persuadenta e savens sorprendenta l'ar-

chitectura grischuna e la natira cun sias midadas e stagiuns, scriva l'Uffizi da cultura grischun en sia communicaziun.



Quest'ovra porta il titel «Windberg I, 2911 m».

Foto L. Degonda

Curt e bun

Num:	Lucia Degonda
Naschida:	29 da zercladur 1955
Creschida si:	a Goldau (SZ)
Burgaisa:	da Sumvitg
Domicil:	Turitg e Sumvitg
Clamada:	fotografa e docenta
Fotograf preferì:	Lee Friedlander
Tschavera preferida:	ensolver
Bavronda preferida:	aua natirala
Regiuns da viadis:	las Alps e Maroc cun la chadaina da l'Atlas